



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

XXV La vie de saint Prosper. Euesque de Rege.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

regle de iustice, miroir de virginité titre d'honneur, exemple de chasteté, Predicateur de la penitence, Docteur de la Foy, plus qu'homme, esgal aux Anges, le sommaire de la Loy, la semence de l'Euangile, la voix des Apostres, le silence des Prophetes, le flambeau du monde, le deuanneur du Iuge, l'hoste de Iesus-Christ, le resmoin de nostre Seigneur, le Sanctuaire de toute la tres-saincte Trinité. Saint Augustin, S. Bernard & autres, l'appellent Trompette du Ciel, Heraut de Iesus-Christ, Secretaire du Pere, Precurteur du Fils, Porte-enseigne du Roy, souverain Predicateur de la penitence, la correction des Iuifs, la ioye de ses parens, la noblesse de sa race, l'exemple du monde, l'exil de la mort, la porte de la vie, l'ornement des hommes, le lustre de la conuersation, la regle & le niueau de la iustice, l'allegresse des Anges, l'homme tres-excellent, parent de Iesus-Christ, amy de l'Espoux, le preparateur & accommodateur des ornemens de l'Espouse. Le mesme S. Bernard l'appelle Patriarche, le Chef & la fin des Patriarches, le Prophete, & plus que prophete, Ange esleu entre les Anges, Vierge, & tres-pur espoux de la virginité, Martyr & lumiere des Martyrs, & celuy qui entre la naissance, & la mort de Iesus-Christ nous laissa vn exemple de tres-constant martyre. Neantmoins toutes les loüanges que les saints ont accumulées parlant de saint Iean Baptiste, quoy qu'elles soient grandes & admirables, ne sont rien au prix de celle que le Seigneur des Saints luy donna. Qu'entre les enfans des femmes, il n'y en auoit point de plus grand que Iean Baptiste; c'est comprendre en vn mot tout ce qui s'en peut dire. Ainsi Eusebe Emisene dit, que S. Iean se peut louer avec vne voix humaine, ayant esté loué de Dieu mesme. Il ressembla tellement en sainteté à Iesus-Christ, qu'en vie on le tint pour le Messie (côme dit S. Ambroise) & apres sa mort le Messie fut pris pour Iean. En fin, apres qu'il eut tres-parfaitement accomply son office de Predicateur de la penitence, de resmoin & de Precurteur de nostre Seigneur, il eut la teste tranchée par le commandement d'Herodes, lequel il auoit franchement blâmé d'auoir pris Herodias, la femme de son frere Philippe, laquelle il entretenoit publiquement, offensant mortellement Dieu, & scandalisant tout le peuple, côme nous dirons le iour de son martyre, que l'Eglise celebre à part, & est cause que nous l'obmettons à present. Nostre Seigneur ne voulut pas que son grand amy S. Iean fust priué de la glorieuse couronne du martyre, pour adiouster à celle de Docteur & de vierge, & aux autres excellences & grandeurs dont nous auons parlé. Outre ce que nous auons de S. Iean en l'Ecriture sainte, presque tous les Docteurs & auteurs de l'Histoire Ecclesiastique, tant anciens que modernes en ont escriit. Lipoman & Surnius rapportent plusieurs Sermons de S. Iean, de ses vertus & priuileges, ausquels ceux qui les desireront voir peuuent auoir recours.

Atel iour naquit S. Iean Baptiste, Precurteur de nostre Sauueur Iesus-Christ, lequel fut remply du S. Esprit, dès le ventre de sa mere. A Rome se fait la Feste des SS. martyrs, lesquels sous l'Empereur Neron ayans esté faussement accusez, d'auoir voulu

bruster la ville, furent en diuerses facons massacrez: les uns reueus de peaux de bestes furent exposez à la mercy des chiens, les autres crucifiez, les autres brulez pour seruir des chandelles de nuit. Ils estoient tous disciples des Apostres, & les premiers des martyrs, que le champ feruil en telle sorte de fruit, enuoya vers nostre Dieu deuant la mort des Apostres mesmes. A Satalas en Armenie, decederent sept freres martyrs, Oronce, Herois, Pharnace, Firmin, Ferme, Cyriaque & Longin, gens d'armes, ausquels par le commandement de l'Empereur Maximian, furent ostées les liures & degrez de soldats, pource qu'ils estoient Chrestiens, & separez, qu'ils furent les uns des autres, moururent tous de pauureté & misere. Au territoire de Paris moururent les SS. martyrs Agourd & Alibert, avec vn nombre presque infiny de Chrestiens & Chrestiennes. A Autun deceda S. Simplicie Euesque & Confesseur. A Style en Calabre S. Iean Thereste, c'est à dire moissonneur, renommé pour sa religieuse & sainte vie.

LA VIE DE SAINT PROSPER
d'Aquitaine, Euesque de Rege.

Saint Prosper estoit François, natif de Gascogne, on ne dict point de quels parens, ny en quel lieu, ny ce qui est de sa ieunesse: on tient seulement que c'estoit vn homme fort docte & eloquent, lequel s'adonnant fort à la sainte Escriture, vn iour à l'ouuerture du nouueau Testament qu'il tenoit en sa main, il tomba sur ce passage où nostre Redempteur dit à ce garçon: *Si vous desirez d'estre parfait, allez vendre tous vos biens, & en donnez l'argent aux pauvres, puis me venez trouuer pour me suivre.* Saint Prosper lisait ces paroles, Dieu parla en son cœur, & l'esmeur aussi viuement, que si l'Euangeliste n'eust escriit ces paroles que pour luy seul: alors esclairé de la lumiere celeste, embrasé de l'amour diuin, il recogneut que Dieu le vouloit appeller à vne plus haute condition, luy faisant renoncer au monde pour suivre l'estendard de nostre Seigneur Iesus-Christ, en la sainte & riche pauuere. Il ne fit pas le sourd à la voix interieure de nostre Seigneur, & incontinent il vendit tous ses biens qui estoient grands, & en distribua l'argent aux pauvres & à ses seruiteurs, donnant la liberté à tous ses esclaves. Estant deliuré de ces chaines & liens, il s'en alla à Rome visiter les corps saints des glorieux Princes des Apostres saint Pierre & S. Paul, ce qu'il fit, avec vne rare deuotion & goust spirituel de son ame.

Le grand Leon premier du nom estoit lors Pape, lequel ayant sceu que saint Prosper estoit venu à Rome, & pour quel suiet, sa qualité, & ses merites, il en fut fort ioyeux, & le fit loger en son Palais, contractant vne estroite communication & familiarité avec luy, estimant que Dieu par vne singuliere providence, le luy auoit enuoyé en ceste rencontre, que l'Eglise Catholique estoit rudement combattuë en diuers lieux des heretiques, specialement es Prouinces d'Orient: car les Impies Nestor & Eutiches nioient les deux natures, la diuine & l'humaine, que les Catholiques confessent en nostre Seigneur Iesus-Chr. & auoient allumé vn feu si estrange, qu'on ne le peut

esteindre en plusieurs années, & fut necessaire de
 25. celebrer des Conciles pour y remedier, entr'au-
 IULI. tres celuy d'Ephese, qui fut du tēps du Pape Ce-
 lestin, & de l'Empereur Theodose le ieune, & le
 Concile de Calcedoine, que le pape S. Leon fit
 assembler sous l'Empire de Marcien, & y enuoya
 S. prosper, avec d'autres prelatz, afin qu'ils aidas-
 sent par leur grande saincteté & science, à con-
 fondre les heretiques, & establir la Foy Catholi-
 que, comme il fit. S. prosper auoit vn grand cre-
 dit aupres du Pape Leon, lequel il seruit en la mes-
 me charge que le grand saint Hierosme auoit
 sous le pape saint Damase de Secretaire Eccle-
 siastique, & de respondre aux consultations que
 toutes les Eglises de la Chrestienté propoioient
 au pape : aucuns disent que le mesme S. Prosper
 fut l'auteur de ceste admirable & diuine Epistre
 de l'Incarnation du Verbe Eternel que saint
 Leon escriuit à Flavian. Outre cela, saint Prof-
 per trouua beaucoup contre les heretiques Pe-
 lagiens desquels, quoy qu'elle eust esté souuent
 condamnée, & presque enseuolie se renouelloit
 & pulluloit tousiours iusques à ce que (comme
 dict Pacion en sa Bibliotheque) par la vigilance
 & industrie dudit S. Prosper, elle fut du tout as-
 soupie.

Et d'autant que certains François reprenoient
 la doctrine de saint Augustin, qui auoit esté le
 fleau de Pelagius, & celuy qui par sa lumiere auoit
 dissipé les tenebres & erreurs de ce peruers
 heretique, ennemy de la grace de Iesus-Christ,
 saint Prosper print la defense de saint Augustin
 en main, en sorte que la vraye & Catholique do-
 ctrine demeura establie & approuuée par le saint
 Siege Apostolique. Lors que saint Prosper y pé-
 soit le moins, S. Leon eut vne inspiration diuine
 de le faire Euesque de Rege, non pas celle de la
 Lombardie, comme on tient communément,
 ains de celle d'Aquitaine en France, qui est la se-
 conde apres celle d'Arles, ainsi qu'a remarqué le
 Cardinal Baronius, & le tire de Sidonius Apollin-
 naris ancien auteur François. S. Prosper se fas-
 cha beaucoup de ceste charge de Pasteur, qui luy
 sembloit surpasser ses forces, & qu'il en estoit in-
 digne : neantmoins il obeyt au Vicaire de Iesus-
 Christ.

Arriuant en son Eglise, il trouua tout le peuple
 desconforté de la mort de son predecesseur, qui
 auoit esté vn saint Prelat, qui fut bien aisé à con-
 soler, voyant que Dieu leur en auoit donné vn au-
 tre si excellent. Apres qu'ils eurent entendu dis-
 courir Prosper, parlant modestement de soy, & de
 la charge de Pasteur, qui les exhortoit à l'assister,
 parce que l'office d'Euesque, dict-il, estoit intolera-
 ble, & que pour le bien exercer, il falloit que les
 subiects aydassent au prelat, sans luy nuire aucu-
 nement, chacun prenant sur ses espaules ce qu'il
 pourroit supporter de ce pesant fardeau, & ne le
 laisser pas tomber sur les reins d'vn seul. Si tost
 qu'il fut en son Siege, il commença à faire le de-
 uoir d'vn tres-saint & vigilant Pasteur, il pres-
 choit souuent avec beaucoup d'eloquence, d'ef-
 ficace, & de profit, parce qu'il n'instruisoit aucu-
 ne chose de la lague, que premierement il ne l'eust

enseignée par son exemple. Il estoit fort charita-
 ble, doux, affable, benin, & moderé à chasser les
 fautes, liberal enuers les pauures qui auoient be-
 cours à luy, & en toutes leurs necessitez, & il les
 secouroit comme vn vray pere. Il admonestoit
 les vieux fraternellement, il corrigeoit les ieunes
 comme ses enfans, facile enuers tous, fors à soy-
 mesme, parce qu'il faisoit des ieunes & peniten-
 ces austeres, sans pardonner à son propre corps.
 Par ceste forme de vie exemplaire, il fut aimé &
 honoré de tous ses subiects, & des Euesques circo-
 uoifins, ausquels il escriuoit plusieurs lettres, pour
 les encourager de seruir fidellement à nostre Sei-
 gneur. Saint prosper vescu (comme le Cardinal
 Baronius) vingt-quatre ans en son Euesché, en-
 core que d'autres ne parlent que de vingt-deux,
 au bout desquels nostre Seigneur luy voulut dé-
 mener la recompense des bons & agreables serues
 qui luy auoit faictz : estant tombé malade, il reco-
 gneut aussi tost que Dieu le vouloit deliurer de la
 prison de ce corps, dont il fut si content, qu'il fit
 assembler ceux de sa maison qui estoient bien de-
 solez & affligez, le priant de ne s'attrister point
 de son depart, ny du besoin qu'ils pensoient auoir
 à l'aduenir de luy ; au contraire, qu'ils se resouys-
 sent avec luy du bien qu'il esperoit de receuoir
 de la misericorde de nostre Seigneur, & qu'il ne
 les abandonneroit pas, estant en lieu d'où il les
 pourroit dauantage aider. Apres il donna la be-
 nedictiō aux Prestres & aux Clercs, & à plusieurs
 de la ville qui l'estoient venu voir. Comme ils
 estoient tous en prieres, l'assistant en ceste agone,
 sa face commença à reluire d'vne nouvelle clarté
 & douceur, redant l'esprit à celuy qui l'auoit creé
 pour sa gloire. Il fut fort regretté de tout le pe-
 uple, & deceda le 25. Iuin, l'an de nostre Seigneur
 466. du temps du pape Hilaire, & de l'Empereur
 Leon. On l'enterra hors de la ville en grande so-
 lemnité, en vne Eglise de saint Apollinar, qu'il
 auoit luy-mesme consacrée. Nostre Seigneur fit
 plusieurs miracles par ce saint prelat, & tous
 ceux qui venoient à son tombeau, obtenoient par
 son intercession ce dōt ils auoient besoin. A quel-
 que temps de là, son corps saint estant encore en
 ceste Eglise (qui estoit petite, & hors la ville) il s'ap-
 parut en songe à l'Euesque son successeur, relui-
 sant, & vestu d'vne robe blanche, d'vn aspect ve-
 nerable, luy commandant de le transporter en vn
 autre lieu plus decenc. L'Euesque fit incontinent
 bastir vne Eglise, & preparer vn Autel magnifi-
 que, ostant le corps saint d'où il estoit : en le de-
 couurant, il rendit vne si suauie odeur, quelle sem-
 bloit estre plus diuine qu'humaine : il fut transpor-
 té avec grande pompe & deuotion en la nouuel-
 le Eglise, nostre Seigneur y renouellant ses mi-
 racles, faisant ouyr les sourds, parler les muets,
 voir les aueugles, marcher les estropiez, & guari-
 fant de toutes sortes de maladies. Saint prosper
 a composé en prose & en vers, monstrant son bel
 esprit, sa doctrine, viuacité & elegance, lesquelles
 ceuures ont esté approuuées par le pape saint Ge-
 lase en vn Concile Romain, où il appella saint
 prosper homme tres-Religieux. Sa vie a esté escri-
 te par Iean Anthoine flamme, rapportée par Su-

zius en son troisieme Tome. Le Martyrologe Romain fait mention de luy, Genade & Honoré d'Aulbourg, & les autres qui parlent des Auteurs Ecclesiastiques, & le Cardinal Baronius en ses Annotations, & es cinquiesme & sixiesme Tomes de ses Annales.

LA VIE DES SAINCTS CUCUFAT, ou Colgat, & Felix, Martyrs

DV temps que Dacien fut enuoyé Presidēt en Espagne, par les Empeurs Diocletian & Maximian, pour l'abreuuer du sang des Martyrs, & abolir s'il eust peu, la Religio Chrestienne. Il y auoit dans la ville de Scitane en Affrique, deux Gentils-hommes Chrestiens l'on tient cōmunēmēt qu'ils estoient freres, lesquels ayant estudié aux bonnes lettres en la ville de Cesarée, & s'estans rendus capables, si tost qu'ils ouyrent parler de l'arriuee de Dacien en Espagne, & à quelle fin, ils penserent auoir trouuē vne belle occasion de recevoir la couronne du martyre par ses mains: De sorte, que ce desir les diuertit de leurs estudes & occupations, & les fit embarquer dans vn vaisseau chargé de marchandise. Ils surgirent au port de Barcelone, desguisez en marchands, & se ioignirent avec les Chrestiens, où ils firent de belles aumosnes aux pauures pendant leur sejour, encourageant & exhortant les Chrestiens de se preparer à la bataille qu'ils attendoient. Il fut concerté par entreux que Felix yroit à Gironne, & Cucufat demeureroit à Barcelone, qui estoient comme les frontieres où se deuoient faire les premieres rencontres & combats de la persecution: nostre Seigneur faisant plusieurs miracles par Cucufat qui preschoit en Barcelone, il fut pris par le cōmandement de Dacien, & tourmenté plusieurs fois par trois Iuges, Lieutenans de Dacien, qui n'espargnerent aucune sorte de gehenneny torture. Le premier de ces Iuges s'appelloit Valere, lequel commanda à douze soldats de le tourmenter, se reposans l'un apres l'autre: ils le foüetterent & esgratignerent la peau si cruellement, que les entrailles luy sortoient hors du corps. Le Sainct fit oraison, & Dieu le guarit si parfaitement, qu'il ne sembloit pas auoir rien enduré, & les bourreaux deuidrent auerugles, & le Iuge abyssina dans la terre, qui s'ouurit & l'engloutit tout vif. Maximian succeda à cestuy-cy, lequel au lieu de se chastier par autruy, continuant l'impieté de Valere fit rostir le Sainct Martyr sur le grill, luy versant sur le corps de la moustarde de strempée en vinaigre. Ce tourment ne le consumma pas, d'autant que nostre Seigneur le seruoit pour souffrir bien dauantage, & triompher plus glorieusement du tyran. Ils le ietterent en vn grand feu, lequel s'amortit à l'instant par sa priere. On le ramena en prison, où nostre Seigneur le consola d'une celeste lumiere, remplissant cest estroit & horrible cachot d'une admirable clarté. Les gardes de la prison se con-

uertirent ayans veu ce miracle. Le lendemain Maximian le fit foüetter avec des nerfs de beuf & des pignes de fer: mais il mourut malheureuse-^{25.}ment allant sacrifier à l'idole de Iupiter, laquelle ^{IVIN.} tomba par terre, & se brisa en mille pieces a, lors plusieurs Gentils se conuertirent, & confesserent que celuy que Cucufat preschoit estoit le seul & vray Dieu, lequel se fauorisoit si visiblement en ses tourmens. Ruffin succeda à Maximian, qui craignant d'estre vaincu de la constance & force inuincible de Cucufat, & que plusieurs autres Gentils se fissent Chrestiens à son exemple, il luy fit trancher la teste le 25. de Iuin. Les Chrestiens empotterent son corps, qu'ils inhumerent à Barcelone, avec tous les honneurs qu'ils luy peurent rendre. Depuis on ne sçait pas quand, ny comment son corps Sainct fut transporté au monastere de Sainct Denis en France, en vne Chapelle qui porte son nom. Aucuns pensent que quand l'Empereur Louys fils de Charlemagne print Barcelone, qu'il emporta le corps de Sainct Cucufat, depuis Iacques Gelmirez premier Archeuesque de Sainct Iacques, en rapporta vne partie en Galice dans l'Eglise de Sainct Iacques (qui solemnise sa Translation) où il est en vne Ghasse richement esmaillée. Il est fait mention de Sainct Cucufat es martyrologes Romain, de Bede, Vsuard & Adon le vingt-cinquiesme de Iuin, es Breuiaries de toledo, & de Barcelone, & en vn Hymne de Prudence.

A Boracē deceda Sainct Sospater, Disciple de Sainct Paul Apolstre. A Rome Saincte Luce vierge & martyre, avec autres vingt-deux. En Alexandrie se fait la feste de Sainct Gallican martyr, qui auoit esté Consul, recen l'honneur d'un triomphe, & fait grand amy de l'Empereur Constantin. Il fut conuertit à la Foy de nostre Sauueur par les Sainctz Jean & Paul depuis martyrs, & ayant esté baptizé, se retira avec Sainct Hilariū à Ostia, ville située sur l'emboucheure du Tybre, où il s'adonna du tout à recevoir & loger les pelerins & passans, & à seruir les malades. Ce qu'estant diuulgé par tout le monde, plusieurs se transportoient là de toutes parts pour voir vn Gentilhomme Romain, iadis Consul de la capitale de l'Vniuers, qui lauoit les pieds des pauures, dressoit les tables, leur donnoit à lauer les mains, seruoit tres-soigneusement aux malades, & s'exerçoit en toutes sortes d'œuvres de misericorde. Il fut depuis sous Iulien l'Apolstre, chassé de là, & se transporta en Alexandrie, où le Iuge Rocian le voulut forcer de sacrifier aux idoles, ce qu'il refusa, & pourtant eut la teste tranchée. A Palmire ville de la Syrie, moururent les Sainctes Libie & Leone seurs, & Eutropie fillette de douze ans, lesquelles apres diuers tourmens, parvindrent à la couronne du martyre. A mesme iour Sainct Antidie Euesque de Bezançon, fut massacré par les Vandales. A Turin deceda Sainct Maxime Euesque & Confesseur, renommé pour sa sainteté. A Regio en Lombardie Sainct Prosper de Guyenne, Euesque dudit lieu, ou de Riex en Prouence, lequel combatit vaillamment pour la Foy Catholique, contre les heretiques Pelagiens. En Hollande Sainct Adelbert Confesseur, Disciple de Sainct Vvillebrord Euesque. Au territoire de Gulsca pres de Nusque, deceda Sainct Guillaume Confesseur, Pere des Hermites du Mont Vierge.

